

UN NOTIZIARI RADIOFONIC SPERIMENTÂL DENTRI DAL 2007. «DAURMAN» PAL MINISTRI



Viers il gr furlan in Rai

Al è previodût un incuintri in curt a Triest par meti in vore il notiziari intant che lis risorsis finanziariis a vignaran metudis adun di ducj i sogjets istituzionâi cjapâts dentri. Al cole cussì l'alibi de Rai



Anunciât l'inviamet di un notiziari radiofonic regional. Tai ricuadris, di çampe: Honsell e bons. Corgnali.

UN NOTIZIARI RADIOFONIC regional sperimentâl par furlan su la Rai, di cinc, dis minûts plui voltis in di, dentri dal 2007, par scomençâ a dâ atuazion ae leç 482/99 su la pupilance des minorancis linguistichis storichis. E «daurman». Lu à prometût lunis ai 11 di Jugn il Ministri pes comunicazions Paolo Gentiloni ae delegazion furlane la-de jù a Rome par discuti dal gnûf contrat di servizi Rai-ministeri des Comunicazions, in particolâr de violazion dal decret di atuazion de leç 482/99. Vuidade dal retôr de Universitât dal Friûl, Furio Honsell, la delegazion e jere componude dal assessôr regional aes Identitâts linguistichis Roberto Antonaz, dal sindic di Udin Sergio Cecotti, dal rapresentant de Arcidiocesi furlane bons. Duilio Corgnali, dal rapresentant dal Comitât 482 Arnaldo Baracetti, cu la partecipazion dal president dal Comitât pes minorancis linguistichis (Confemili) Domenico Morelli.

Tal ultin contrat di servizi, firmât in Avrîl, no son stât metûts dentri, ancjemò une volte, i contignûts minimis di tutele de lenghe furlane. La cuistion e jere stade frontade la ultime volte dai rapresentants di ents, associazions e istituzions locâi ator ae taule inmaneade ai 16 di Avrîl de Vite Catoliche e cumò l'incuintri cun Gen-

tiloni – favorît dal lavôr di relazion dal onorevul Ivano Strizzolo –, che al à vût un esit, al pararès, positif. Ma al è adore par cjanâ vitorie. Al è previodût un incuintri in curt, probabilmente dentri dal mês di Jugn tant che al conferme Strizzolo, li de sede Rai di Triest par meti in vore il notiziari, par definî lis modalitâts organizativis, intant che lis risorsis finanziariis a vignaran metudis adun di ducj i sogjets istituzionâi cjapâts dentri. Fasint in sumis ce che la Rai, servizi public, e sarès tignude a fâ, tant che al ricuarde bons. Corgnali, ma «cumò – al zonte – al è plui impuartant inviâ lis robis». Di Rome a vignaran sù dai delegâts de Rai e dal ministeri des Comunicazions.

«Gentiloni si è impegnât a poni la cuistion cun fuarce ae Rai, concessionarie dal servizi public radiotelevisif», al conte Honsell. «Al è un risultât une vore positif sul plan simbolic – chi no si fevele di trasmeti programs intune fasse orarie secondarie –, se pardabon lu si tradûs in curt. O vin domandât la aplicazion de tutele des minorancis linguistichis in materie radiotelevisive, si scomence cussì par rivâ ai programs pe television e il potenziament de sede Rai di Udin. I ai dit al ministri che la Universitât e fasarà la sô part sei in tiermins di risorsis umanis sei

finanziariis, ançe se al covente tradusi comunicâts o altri. Che no si scuindin, duncje, daûr dal "no vin i bêçs". O domandin un salt di cualitât».

Ma al covente vuardiâ. Lu dis Honsell, lu dis ançe bons. Corgnali. Tant che diretôr de Vite Catoliche, a jerin stadis tiradis sù 54 mil firmis a pro di une Rai autonome in Friûl. «'nt vin sintudis talmentri tantis par no jessi preocupâts e lassâsi là al entusiasim. Cumò – al sotlinie – o vin di stâ sot par che al succedi ce che nus àn prometût a Rome. I esperts che a jerin presints a àn cjacarât di progjet "fatibil"».

L'impuartant però, par Corgnali, al è che il ministeri i fasedi simpri part de partide. «Se i esperts a vegnin sù e in curt a concuardâ alc, alc si fasarà, se il Ministeri al manten une part ative te cuistion alc al podarès succedi, se al demande dut ae Rai, nol succedarà nuie. Ançe il ministri Gentiloni – al ricuarde Corgnali – al à dit che il probleme nol è il ministeri, ma de Rai, che e à pôre di ce che a podarèsin fâ chês altris minorancis ator pe Italie, mancual organizadis di chê furlane, dulà che no son structuris ni competencis. Al è un probleme di bêçs, di ce che e podarès vignî a costâ». Ciert che l'alibi de Rai cumò no sta in pîts in grazie dai jutori dai sogjets istituzionâi locâi.

Tra lis pussibilitâts che si è fevelât a Rome ançe chê di programâ i notiziari par furlan su la Tierce ret bis, chê doprade pai programs par sloven.

ERIKA ADAMI